

BOSNA I HERCEGOVINA
Konkurencijsko vijeće



БОСНА И ХЕРЦЕГОВИНА
Конкуренцијски савјет

**Rješenje po Zahtjevu za donošenje privremene mjere
privrednog subjekta Dejan komerc d.o.o. Doboj
protiv privrednog subjekta Apatinska pivara d d.o.o. Apatin**

**Sarajevo,
juni, 2013. godine**



Broj: 02-26-3-18- 42-II/12
Sarajevo, 11.06.2013. godine

Na osnovu člana 42. stav (2), a u vezi sa članom 40. stav (1) Zakona o konkurenciji („Službeni glasnik BiH“, br. 48/05, 76/07 i 80/09), Konkurencijsko vijeće je na 62. (šezdesetdrugoj) sjednici održanoj dana 11.06.2013. godine, donijelo

RJEŠENJE
o odbijanju Zahtjeva za donošenjem privremene mjere

1. Odbija se Zahtjev privrednog subjekta Dejan komerc d.o.o., Ozrenskih srpskih brigada 38A, 74000 Doboj, za donošenje privremene mjere u postupku koji se vodi pred Konkurencijskim vijećem po Zaključku o pokretanju postupka broj: 02-26-3-18-11-II/12 od 26.02.2013. godine protiv privrednog subjekta Apatinska pivara Apatin d.o.o. Trg oslobođenja 5., 25260 Apatin, Republika Srbija radi utvrđivanja postojanja zabranjenog sporazuma u smislu člana 4. stav (1) pod a), b) i d) Zakona o konkurenciji, kao neosnovan.
2. Ovo Rješenje je konačno i bit će objavljeno u «Službenom glasniku BiH», službenim glasilima entiteta i Brčko Distrikta Bosne i Hercegovine.

O b r a z l o ž e n j e

Konkurencijsko vijeće je zaprimilo, dana 29.01.2013. godine pod brojem: 02-26-3-18-5-II/12, Zahtjev za pokretanje postupka (u daljem tekstu: Zahtjev), u smislu člana 28. Zakona o konkurenciji (u daljem tekstu: Zakon), podnesen od strane privrednog subjekta Preduzeće za spoljnu i unutrašnju trgovinu i usluge Dejan komerc d.o.o., Ozrenskih srpskih brigada 38A, 74000 Doboj (u daljem tekstu: Podnosilac zahtjeva ili Dejan komerc), kojeg zastupa advokat Duško Panić, Cara Dušana 56, 74000 Doboj (punomoć izdata dana 11.02.2013. godine u Doboju).

Predmetni Zahtjev je podnesen protiv privrednog subjekta Apatinska pivara Apatin d.o.o. Trg oslobođenja 5, 25260 Apatin, Republika Srbija (u daljem tekstu: Apatinska pivara) kojeg zastupa advokat Dina Duraković Morankić, Zmaja od Bosne 7, 71000 Sarajevo (punomoć izdata dana 27.05.2013. godine u Apatinu) radi utvrđivanja postojanja zabranjenog sporazuma u smislu člana 4. stav (1) pod a), b) i d) Zakona.

Zahtjev je zatim dopunjen dana 31.01.2013. godine podneskom broj: 02-26-3-18-6-II/12.

Uvidom u dostavljeni Zahtjev i dopunu Zahtjeva, Konkurencijsko vijeće je utvrdilo da isti nije potpun i kompletan, u smislu člana 28. stav (2) Zakona, te je zatražilo dopunu dokumentacije, dana 04.02.2011. godine aktom broj: 02-26-2-18-7-II/12.

Podnosilac zahtjeva je dana 13.02.2013. godine, podneskom broj: 02-26-3-18-8-II/12, dostavio traženu dopunu Zahtjeva.

Nakon kompletiranja Zahtjeva, Konkurencijsko vijeće je Podnosiocu zahtjeva izdalo Potvrdu o prijemu kompletnog i urednog Zahtjeva, u smislu člana 28. stav (3) Zakona dana 15.02.2013. godine, aktom broj: 02-26-3-18-9-II/12.

Konkurencijsko vijeće je, u skladu sa članom 32. Zakona, donijelo Zaključak o pokretanju postupka dana 26.02.2013. godine aktom broj: 02-26-3-18-11-II/12.

U toku postupka, Podnosilac zahtjeva je dana 29.04.2013. godine Konkurencijskom vijeću dostavio Urgenciju sa prijedlogom donošenja privremene mjere broj: 02-26-3-18-20-II/12 (u daljem tekstu: Zahtjev za donošenjem privremene mjere) u kojoj navodi da privredni subjekt Apatinska pivara već pet godina (u periodu od 2008. godine do 2013. godine) pričinjava nenadoknadivu štetu Podnosiocu zahtjeva, pri čemu pravi diskriminaciju obustavljanjem isporuka proizvoda i drugim radnjama.

U Zahtjevu za donošenjem privremene mjere se dalje navodi da je Apatinska pivara dovela Podnosioca zahtjeva u tešku finansijsku situaciju iz razloga što sprječava Podnosioca zahtjeva da učestvuje na tržištu prodaje piva Apatinske pivare u Bosni i Hercegovini. Dalje se navodi da je Apatinska pivara sa Podnosiocem zahtjeva od dana 01.01.2012. godine bez opravdanih razloga prekinula dalju saradnju i nezakonito istog isključila iz distributivne mreže na tržištu Bosne i Hercegovine nakon što je Podnosilac zahtjeva pokrenuo tužbu pred Privrednim sudom u Somboru zbog nepoštivanja ugovorenih obaveza od strane Apatinske pivare kao i zbog pokretanja postupka pred Konkurencijskim vijećem zbog zaključivanja zabranjenih sporazuma.

Slijedom navedenog, Podnosilac zahtjeva je predložio Konkurencijskom vijeću na osnovu preliminarno utvrđene povrede konkurencije u Rješenju Konkurencijskog vijeća broj: 02-26-2-028-145-II/11 od 04.09.2012. godine donošenje rješenja o privremenoj mjeri, u smislu člana 40. Zakona, kojom se obavezuje privredni subjekt Apatinska pivara da u roku od 15 dana nastavi snadbijevati Podnosioca zahtjeva svojim proizvodima pod istim uslovima kao i ostale distributere u Bosni i Hercegovini.

Konkurencijsko vijeće, imajući u vidu navedeno, ističe da je Rješenjem broj: 02-26-2-028-145-II/11 od 04.09.2012. godine utvrđeno da je privredni subjekt Apatinska pivara odredbama Kupoprodajnih ugovora za period 2008.-2010. godine zaključio zabranjeni sporazum, u smislu člana 4. stav (1) tačka a) i d) Zakona.

Zaključkom o pokretanju postupka broj: 02-26-3-18-11-II/12 pokrenut je postupak radi utvrđivanja postojanja zabranjenog sporazuma odredbama Kupoprodajnih ugovora za 2012. godinu, u smislu člana 4. stav (1) pod a), b) i d) Zakona.

Shodno navedenom, Konkurencijsko vijeće nije u mogućnosti na osnovu dostavljenih dokaza utvrditi preliminarnu povredu Zakona, u smislu člana 40. Zakona.

U skladu sa izloženim Konkurencijsko vijeće je odlučilo kao u dispozitivu Rješenja.

Pouka o pravnom lijeku

Protiv ovoga Rješenja nije dopuštena žalba.

Nezadovoljna stranka može pokrenuti upravni spor pred Sudom Bosne i Hercegovine u roku od 30 dana od dana prijema, odnosno objave ovoga Rješenja.

Predsjednik

Gordana Živković